

籌辦夷務始末

咸豐朝
卷五十三之五十四

圖書集成

卷一百一十五
目錄

籌辦夷務始末卷之五十三

咸豐十年庚申五月辛亥

諭軍機大臣等前因夷人於煙臺地方占房蓋屋。疊經諭令文煜嚴禁。奸民接濟。並交易貨物。及沿海民人。不可任聽該夷雇募服役。尚未據該撫將辦理情形覆奏。近日朕聞夷人於到煙臺後。將商船之大者。悉行奪去。居民商賈。遷徙一空。隨至福山縣城內。以修夷館通商為辭。向該知縣索取夫馬。搬運瓦石。知縣等官業已避去。復於廟島長山島修築礮臺數座。府城官屬聞風遠避。該夷即至城內。居府署者數日。復回島中。並聞海口地方。銀價驟落。及夷人所帶廣勇。時出滋擾。土匪亦乘機擄搶。總

兵曾逢年。署知縣陳壽元並未認真彈壓。民心不服各等情。夷人盤踞煙臺。逗留不去。全在地方官設法防範。杜其窺伺。乃該守令等於夷人任意往來。不能攔阻。復安望其約束民人。斷絕接濟耶。府縣官屬紛紛避出。尤堪詫異。是否果有此事。該撫身膺疆寄。何竟毫無聞見。著即將以上各情據實覆奏。嗣後務須派委妥員查探確情。隨時具奏。勿任朦蔽。至夷人之建造房屋。修築礮臺。無非挾制通商。且恐有截劫漕船。勒收商稅諸詭計。而海口各處銀價日賤。非內地奸商私買洋銀。何以至此。尤當嚴行禁絕。現在和約未定。斷難任令於各海口盤踞。得以遂其要挾之計。著文煜仍遵前旨。嚴飭地方官認真查禁居民接濟。

食物。交易錢貨。並受夷人雇募。聽其役使。儻因目前小利。必至
受害無窮。廣東之事。即是前車之鑒。須切實開導。內地民人。庶
該夷無可希冀。自當廢然思返。至地方文武。不遵諭旨。著即嚴
叅示懲。以儆疲玩。並嚴催知府董步雲等。迅即設法開導。勿令
遲延。至該撫前奏。調派馬隊等兵。籌辦防堵。應如何不動聲色。
嚴密設防。即著妥為籌畫。毋稍疏忽。自干重咎。

壬子。山東巡撫文煜奏。竊臣前自夷人攔截漕船。以至載
來馬匹。業將該夷情形。五次奏報在案。旋又據報。該夷載
來牛三四十隻。上岸牧放。又由山上搬取亂石。於海岸砌
作馬頭。又挖地作竈四座。上蓋鐵面。長寬均約丈餘。又駛

來大船二隻。各船均放礮迎接。載來夷兵五百名。又載來食物箱盒。蓋房木料木架。不計其數。又准登州鎮咨。據甯福營屬之威海汛把總具報。五月初六日申刻。該處到來輪船一隻。有夷人十餘名。帶同通事周姓。至署聲稱。伊係啖咭喇國。有兵船四五十隻。約兵萬餘。五七日內即到威海。在城外支搭帳房。安營居住候信。因恐百姓驚慌。故特令伊先來告知等語。該外委覆以地瘠民貧。不堪居住。該夷云。營盤一定要安。不過前來告知。明日即須前赴關東。言畢即上船去訖。又迭據委員署青州府知府董步雲稟報。該員先於登萊一帶途次。探得該夷所稱孟總統者。現

今實在張姓名張二林即張殿華屋內居住外似占踞而
張二林係奇山所人向來煙臺開設德盛號棧行去年忽
於煙臺山下西面新蓋房屋一所計六十餘間土人咸知
其家道不豐何以有錢蓋房且山下亦非設立行棧之所
人皆詫異乃工作方完而該夷適至爰居爰處儼然賓至
如歸又該夷初到時各鋪戶問其來意該夷聲稱爾等不
必驚慌我等不過暫住數日注意祇在天津蕞爾煙臺即
大皇帝准我通商我亦不要而夷情反覆詭詐厥後鑿井添井蓋
房數十間煙臺山以東俱造馬頭又似必非暫住之計且
屢囑各鋪戶搬回照常開張而被擄同來之閩廣人又私

向各鋪云爾等弗信以為實。我等從前皆為所愚。搬回必致搶擄。惟細察閩廣人言語形貌。定非善類。該府於初八日。行抵福山。又探得煙臺街上。帳房徧滿。往來皆係夷人。約計八九千名。先因有酒醉滋事者。各鋪約得十餘家。上山見伊頭目控告。內有白夷一人。能說官話。通事二人。一河南陶姓。一浙江楊姓。均稱不要害怕。大將軍在後。尚有馬八百對。二將軍亞蒙先來。祇為去歲天津之事。今歲特然來此。喚咭喇赴牛莊。各鋪告以喫酒滋鬧之事。該夷人又出示禁止。不准擅自進莊。山上器具各項俱全。所住房屋。均欲議價。或典或買。均可。麥地支搭帳房。亦欲給錢賠

償山南平坦之地。又丈量多處。船上帶來梁架板片。均係現成之物。數日間即蓋起十餘座房屋。皆兩層檐。石作木作。瓦作。概不用內地之人。半里間設一小營房。巡兵逐日一換。晝夜陰雨。莫敢或離。有偷取物食。及越牆取雞。攔阻受傷者。當時發落。給受傷人洋錢四元養傷。且告知大眾。以後有不法者。即拏其帽子為憑。緣帽內各有名字。按帽查冊。毫無遺漏。各等情。該府董步雲。即於初八日。囑令紳士鋪戶等。傳知該夷。定期見面。至初十日。據通事李姓云。願意談談。第將軍公事甚忙。明日見否未定。該府當即到。此三日。不能久待。務須該通事轉告。於明日午刻見面。

辰刻先在山下。與通事敘談等語。覆知去後。迨該府發稟時。業已戌正。尚無回信。不知是何詭計。該府等定於十一日辰初。往見李通事談畢。即上山見該夷酋。一俟見後覆到。是何情形。即行飛速馳奏。

諭軍機大臣等。昨因聞夷人於煙臺地方。有修築夷館礮臺等事。諭令文煜設法防範。本日據文煜奏。夷人於煙臺砌築馬頭。續到夷兵五百名。並稱有馬八百對在後。復有夷人到威海地方。聲稱。喚夷船四五十隻。兵萬餘名。即日到彼安營。並據委員董步雲等報。奇山所人張二林。為夷人於煙臺地方。豫為蓋屋。並有閩廣人同來。該守現擬往見夷酋等語。本日有人奏。夷人到

山東後有馬隊三千上騎中空木人內裝火藥每日上岸操演近復募到潮勇五六千人間日十餘人或二三十人不等結伴北行防堵官兵毫無覺察沂州府屬之莒州不通大路月內忽有南來人眾數起皆官兵衣裝口操粵音稱係由河南撤防回京從此經過並無印文執照地方官弁絕不查究並聞去歲夏間福山縣知縣余招賣給該夷海岸數段索得重價盡飽私囊是以本年夷人上岸支搭帳房欲蓋夷館此沿海居民所共知者請飭該撫查奏各等語所奏情形決非無因何以該撫毫無聞見夷人到海口者既有數千人兼帶有馬匹其為意圖一逞已可概見著文煜即日出省前赴登萊青一帶擇要駐紮籌辦

防堵該撫前調馬步各軍尚屬單薄。德楞額軍營馬隊較為得力。如何分撥著即與德楞額商撥數百名聽候該撫調遣。其餘本省官兵如尚有可調之處並著酌量派撥。該夷如並無滋擾自宜不動聲色密為防範。儻圖攻撲城池或直圖撲天津後路或即由直省徑奔京師一帶地方著文煜相機前進設法堵剿不得任其橫恣。至潮勇陸續北來自係欲於津沽左近設伏俟夷船到時水陸並發使我猝難抵禦。著文煜嚴飭各府州縣及自登至直應行經過地方文武員弁督率兵役嚴密訪查儻有假作官兵裝束結隊口操粵音並無印文執照者立即拏辦該撫仍派明幹大員前往各屬查察儻該地方官奉行不力即予

嚴叅委員董步雲等。所稟閩廣人告知各鋪不可搬回之言。自屬實情。正可藉此開導各商民。勿為夷人所愚。致被搶擄。至民人接濟食物。交易錢貨。及甘心僱給夷人役使等事。仍著遵照前旨。妥為查禁。該撫身膺疆寄。當此夷情喫緊之時。諒不敢泄。省從事。自干咎戾。其何日出省。及如何辦理之處。均著詳細馳奏。至已革福山縣知縣余栢。如何將海岸數段。賣給夷人。以致夷人有可藉口。徑行上岸居住。實屬可惡。即著文煜密速訪查。一經得實。即將該革員拏問懲辦。不得稍涉徇隱。

欽差大臣科爾沁親王僧格林沁。直隸總督恆福奏。咸豐十年五月初九。初十。十五等日。承准軍機大臣字寄。五月初八。初

九十四等日。恭奉

上諭三道。並鈔錄薛煥原奏一件。均已敬謹聆悉。查現在夷人於山東之煙臺等處。登岸駐紮。與本地商賈互市。又於奉天金州洋面。停泊夷船多隻。續行劫擄商船。並往日本國。及小呂宋。購買馬匹。欲用稻草。紮草人於馬上。用衝頭陣。繼以精銳夷兵。及填塞天津溝坎。購覓板片。打造小船。意在天津同時並進之用。查該夷狡獪異常。情形實屬叵測。誠如

聖諭。該夷詭詐百出。不可稍存大意。尚宜悉心籌度。講求應敵之方。現在海口一帶。處處溝槽。中間隙地。今年雨水較多。濠

牆以外。盡皆泥淖。兩岸亦皆嚴加偵探。設使該夷馬隊。果敢登岸。抄襲營壘。等惟有飭令馬隊。相機截剿。即使該夷填溝塞濠。豈能盡知。大沽營盤左右。有此層層濠溝。況有馬步嚴防。正欲誘其深入。儻喚拂兵船。駛至海口。並不直入攔江沙。在外停泊。似有等候講話情形。等恆福即行遵旨派員赴該夷船。訊其來意。令其前往北塘講話。若該夷不候理諭。徑行闖入攔江沙內。是狂悖之形已露。等亦不敢坐失機宜。不得不以火器抵禦。刻下直隸沿海口岸。雖節經探報。並未見有夷船帆影。等惟有恪遵

諭旨傳知各營將士並飭令西凌阿增慶等一體嚴密防範沿海

一帶妥為偵探以期仰副

皇上訓示諄諄慎重海防之至意

諭軍機大臣等前因夷人在煙臺地方占房蓋屋金州海口到有
夷船六十餘隻並於外洋購買馬匹廣東購買稻草木板等物
迭經諭令僧格林沁等加意嚴防不可掉以輕心本日據僧格
林沁等奏偵探防守情形一摺據稱海口一帶處處溝槽今年
雨水較多濠牆外盡皆泥淖該夷即欲填溝塞濠亦不能盡知
大沽營盤虛實且正欲誘其深入現已傳知各營並飭令西凌
阿增慶等嚴密防範及沿海一帶妥為偵探各等語所籌尚屬

周密。本日又據文煜奏。夷人到煙臺後。續載來牛三四十隻。上岸牧放。並搬取亂石砌海岸馬頭。又駛來大船二隻。載有夷兵五百。威海汎地方。到來輪船一隻。有夷人十餘名。聲稱。喚國有兵船四五十隻。約兵萬餘。五七日內即到威海煙臺街上。夷人往來約八九十。據通事云。大將軍在後。尚有馬八百對。二將軍亞蒙先來。祇為去歲天津之事各等語。又本日有人奏。夷船泊福山海口。有馬隊三千。上騎中空木人。內裝火藥。每日上岸操演。復聞募到潮勇約五六千人。間日十餘人。或二三十人不等。結伴北行。文煜所派防堵兵五百名。毫無覺察。又沂州府屬之莒州。不通大路。月內忽有南來人眾數起。皆官兵衣裝。口操粵